

Մ Ա Ն Ր Ո Ւ Ք

ԼԵՒՈՆ ՄԱՆՈՒԷԼԵԱՆՅԻ

I

Մենակ ես նըստած եմ տխուր սենեակում
Մարող ճըրագիս առաջին.
Եւ դուրսըն անձրեւ է մաղում ու մաղում,
Սուլում ու կոծում է քամին...
Մենակ ես նըստած եմ և լաց եմ լինում,
Ինչպէս որբացած մի մանուկ,
Եւ ինքքս, ես ինքքս էլ չեմ հասկանում՝
Ինչո՞ւ եմ թափում արտասուք:

II

Կայ մի մայր հեռաւոր հարաւում,
Ձառամեալ, սըրտամաշ մի էակ.
Լուռ ու մունջ նա արցունք է թափում,
Անտէր, անըստի, միայնակ:

Արցունք թափելով ըսպասում է
Նա անգին և պանդուխտ իւր որդուն.
Բայց որդին հողի տակը նընջում է
Հեռաւոր ձիւնապատ հիւսիսում: